

22 SEP 2002

JKKK DISARAN LAKSANAKAN KEGIATAN EKONOMI

BANGI, 22 Sept (Bernama) -- Jawatankuasa Kemajuan dan Keselamatan Kampung (JKKK) hari ini disaran melaksanakan kegiatan ekonomi yang boleh memberi pendapatan tambahan kepada para penduduk kampung.

Timbalan Menteri Pembangunan Luar Bandar Datuk G. Palanivel berkata JKKK tidak sepatutnya memberi tumpuan kepada usaha memperbaiki kemudahan prasarana seperti jalan raya dan longkang semata-mata.

"Tibalah masanya bagi JKKK memainkan peranan lebih penting bagi mengurangkan jurang pendapatan antara penduduk luar bandar dan penduduk bandar," katanya semasa menutup kursus pengurusan bagi 70 anggota JKKK dari Hulu Selangor di sini, hari ini.

Kursus tiga hari itu adalah anjuran Kementerian Pembangunan Luar Bandar yang bertujuan meningkatkan kemahiran pengurusan di kalangan anggota JKKK.

Palanivel, yang juga anggota Parlimen Hulu Selangor turut meminta JKKK memberi perhatian kepada ucapan Bajet 2003 Perdana Menteri Datuk Seri Dr Mahathir Mohamad di Parlimen Jumaat mengenai konsep "satu kampung satu industri."

Katanya, JKKK harus memberi tumpuan terhadap usaha mengatur dan melaksanakan program ekonomi bagi faedah penduduk kampung.

-- BERNAMA

NN RV TS SP MOZ